

# Gion Monn, Sedrun

GR 17.10.86



(G.F.) Ils 26 da settember 1986 annunzia il zenn da s. Vigeli a Sedrun che il Sigrur sur veta e mort hagi clamau tier el siu survient e nies preziau convischin Gion Monn. Avon cuort temps hava veva el bein stuiu serender a Cuera el Spital dalla Crusch per encuir leu levgiament. Suenter cuorta dimora ha el puspei saviu returnar a casa. El se senteva aunc dètg stupent (silmeins tenor nies manegiar) - e tonaton ha la criua mort tschuncanau tut anetgamenin quella plonta da statura pintga e falombra. Tonpli ei la dolur per ils ses stada zun gronda muort in tal cumiau per adina. El habitava en sia casa - ensemen cun sia cara sora Tonia e siu quinai Luis che han adina giu bien quitau e fatg bien cul Gion. Ad els seigi engraziau persuenter.

Il Gion ei naschius a Sedrun ils 28 da decembre 1923 - sco secund davos da 9 fargliuns - dils geniturs Stiafen e Christgina Monn, naschida Giger. En quei ambient ei nies trapassau carschius si. Gia en giuvens onns - ual ch'el era ord scola - piarda el sia buna mumma che va enta parvis memia baul. Ed el senta la dolur da buca pli haver la mumma. Ensemes cun siu bab ha el fatg il pur cun quei pauchet che deva lezs onns. Il Gion sededica d'ir sillalavur. La stad eis el s'engaschaus tier la Firma Murer, igl unviern tier ils ruanals. E quei mava dètg pulit entochen che ina nauscha e maligna malsogna tucca nies bien Gion. Quei ei iu entochen che el ha stuiu dar si la lavur per adina. Mo el ha saviu seremetter alla veglia da Diu. Cu ins entupava el, fageva el adina bucca rienta e maina ch'el vess lamentau.

Nus astgein buca emblidar ch'il trapassau ei staus a sias uras confundatur dalla «Uniun da Lourdes Sur-selva». Per quella ha el fatg bia bien. Sch'ins vegneva en raschieni cun el, plidava el adina surlunder. El veva

ina cardientscha profunda. Che Nos-sadunna da Lourdes ha preparau in bien plaz per siu veneratur enta parvis, astgein nus crer.

Ils 29 da settember han ins accumpagnau e pertau il Gion alla fossa. Leu spetga el sillla gloriusa levada. Ina baseliada en malencurada, cun pliras bandieras, ed ina gronda delegaziun en lur bialas monduras dalla «Uniun da Lourdes» han assistiu. Ina fuola sco ins ha darar viu a Sedrun. Nus astgein menziunar ils bials plaids da nies bien sur plevon Giusep Cathomas. Il Gion fuvi in da siu persei, cun negina cannera, ed oz semuossi ei tgei ch'el hagi fatg e co el vegni remunerlaus. Quella sepultura vegna a restar a nus en buna memoria. Al Gion clamein nus tier: seregorda da nus tutts enta parvis e roga Nossadunna da Lourdes che ella urbeschi ora era a nus ina bun'ura da nossa mort. Il Segner detti a Ti ed a tutt nos cars defuncts il rauas perpeten! A Tes cars restai anavos nossa pli sincera condolentscha!